

PIDAGING

AWIG- AWIG DESA ADAT BANDA

	Widang
SARGA	I ARAH LAN WIDANGAN DESA
SARGA	II PATITIS LAN PEMIKUKUH
SARGA	III SUKERTA TATA PAKRAMAN
	PALET 1. Indik Krama
	PALET 2. Prajuru Dulun Desa
	PALET 3. Indik Kulkul
	PALET 4. Indik Paruman
	PALET 5. Indik Padruwan Desa
	PALET 6. Sukerta Pamiteges
	Kaping 1. Karang Tegal lan Carik.....
	Kaping 2. Pepayonan
	Kaping 3. Wewangunan
	Kaping 4. Wewalungan
	Kaping 5. Bhaya
	Kaping 6. Panyanggran Bhaya
SARGA	IV SUKARTA TATA AGAMA
	PALET 1. Indik Dewa Yadnya
	PALET 2. Indik Resi Yadnya
	PALET 3. Indik Pitra Yadnya
	PALET 4. Indik Manusa Yadnya
SARGA	V SUKARTA TATA PANGAN
	PALET 1. Indik Pawiwahan
	PALET 2. Santana
	PALET 3. Indik Warisan
SARGA	VI WICARA LAN PAMIDANDA
	PALET 1. Indik Pamidanda
SARGA	VII NGUWUH-NGUWUH AWIG_AWIG
SARGA	VIII PAMUPUT
SUSUNAN PENULIS AWIG-AWIG DESA ADAT BANDA	

**MURDHA CITTA
AUM, OM**

OM Swastyastu, Om Awighnamstu nama sidham.

Putusing sadha Krama Desa Adat Banda gumawa Awig-awig Desa Pakraman maka sepat siku-siku pmuput, wastu kasidhan prayojana mami kabeh prasama anghidep mwah amagehake kadi lingging Awig-awig iki.

**SARGA I
ARAN LAN WAWIDANGAN DESA
Pawos 1**

- 1) Desa Adat puniki mawasta Desa Adat Banda
- 2) Jebar kakuwub wawidanganya mawates :
 - a. Sisi Utara ring Desa Adat Blangsinga
 - b. Sisi Purwa ring Desa Adat Prangsada
 - c. Sisi Daksina ring Desa Adat Pinda
 - d. Sisi Pascima ring Desa Adat Bonbiyu
- 3) Desa Adat puniki kawangun antuk karang ayahan Desa lan Karang Guna Kaya, Desa puniki wantah asiki Banjar, inggih punika Banjar Banda tur kaepah dados duang tempekan luwirin :
 - a. Tempekan Siki
 - b. Tempekan Kalih

Pawos 2

- 1) Manut Tri Lingganing Desa, kakuwub wawidangan punika tigang pawos luwire :
 - a. Utama Mandala : Linggih Kahyangan Desa
 - b. Madya Mandala : Pupulan Karang Desa, Karang Guna Kaya lan telanjakan
 - c. Nista Mandala : Setra Desa Adat
- 2) Wates palebahan tempekan / Banjar patut :
 - a. Kamanggehang antuk paruman Desane
 - b. Wenang keuwah manut nunjuk lungsurin cacah jiwa manut pararem

Pawos 3

- 1) Tempekan wenang ngardi paswara maka pamitegepnya
- 2) Paswara tempekan tan wenang lempas saking Awig-awig lan pararem Desa Adat

**SARGA II
PATITIS LAN PAMIKUKUH
Pawos 4**

Desa Adat Banda ngemanggehang pamikukuh minakadi :

- a. Pancasila
- b. Undang – Undang Dasar 1945 pamekas pasal 18
- c. Peraturan Daerah Propinsi Daerah Tingkat I Bali No. 06 Tahun 1986
- d. Tri Hita Karana manut sada cara Agama Hindu

Pawos 5

Luwir patitis Desa Adat Banda :

- a. Mikukuhin miwah ngrajegang Sang Hyang Agama
- b. Nginggilang Tata Prawerti Maagama
- c. Ngrajegang kasukertan Desa saha pawongannya sakala kalawan niskala

SARGA III SUKERTA TATA PAKRAMAN

Palet 1

Indik Krama

Pawos 6

- 1) Sane kabawos karma Desa inggih punika kulawarga sane maagama Hindu, manga karang Desa, ngenahin karang guna kaya, netep wiadin madunungan sajeroning palemahan Desa Adat Banda manut pararem
- 2) Sajaba punika sinanggeh tamiyu

Pawos 7

Karma Desa Adat luwir ipun :

- a. Karma ngarep ninggih punika karma sane ngamong karang, utawi tan ngamong karang nanging sampun mawiwahan tur sampun katedunang makrama Banjar ngarep tur kasaksinin olih Prajuru Desa
- b. Karma balu salah sinunggil lanang utawi istri saking karma (ngarep) lampus, utawi sangkaning nyapihang
- c. Karma tapukan inggih punika karma ngarep, aji miwah byangyane lampus, sakewanten durung pantes ngayah

Pawos 8

Kawit dados Krama Desa wenten kalih soroh :

- a. Mawit jumenek mapumahan utawi ngarereh pangupa jiwa sajeroning palemahan Desa Adat
- b. Malarapan antuk pawiwahan pratisantana wit ring ajeng Pawos 7 aksara a

Pawos 9

Panemaya tedun makrama Desa Adat utawi makrama Banjar :

- a. Melarapan antuk pawiwahan ngawit rahina Pamacekan Agung Wuku Kuningan, manut pararem
- b. Malarapan patilar rahayu saking ngarereh pangupa jiwa saha jumanek risampun polih tempo enem sasih, tur kateduninang makrama banjar suka duka
- c. Malarapan antuk patilar rahayu saking warga Desa sewos patut risampun atur supeksa ring Prajuru Desa Adat Banda maka sarana ilikita kesah pastika
Suwang karma manut ring aksara b miwah c ring ajeng patut :
 1. Tinut ring sadaging Awig-awig, pararem, pasuwara, Desa Adat Banda
 2. Nawur pamopog manut pararem

Pawos 10

Tategenan Krama Desa makadi ring sor :

- a. Karma ngarep keni ayah miwah papeson sawungkul
- b. Karma balu keni ayah separo manut kawentenanya miwah papeson sawungkul
- c. Karma tapukan yan sampun mayusa 17 warsa utawi sampun mawiwaha, tan kantung katapuk patut keni tategenan sekadi ayah ngarep

- d. Yan wenten karma tapukan kantong masekolah, durung mawiwaha, tan keni tategenan saha malarapan antuk ilikita saking sakolahnyane, papeson keni kadi patut
- e. Karma jaba kuta desa Adat banda keni tategenan (puniya) sebilang 6 bulan apisan manut pararem
- f. Prade rikalaning ngayah wenten sinalih tunggil karma matilar tan pasadok sadereng puput karya, wenang karma inucap keni pamidanda manut pararem, tanjek taler kawastanin

Pawos 11

Swadarmaning karma, sewosan ring ayah-ayah luwire :

- a. Satinut ring sadaging Awig-awig, parareman lan pasuwara desa
- b. Tan maren ngutsahayang mangda Desane prasida nyujur manut patitis

Pawos 12

Patias olih-oli Krama Desa utawi Banjar luwire :

- a. Polih pasayuban, Prajuru ngamanggehang manut patitis tur kabawosin, saha katiwakin pamutus sahaning wicaranya
- b. Nyarengin paruman Desa/ Banjar tur wenang mastikayang pamutus

Pawos 13

Krama Desa kengin sekadi ring sor :

- a. Luput ayah/pamerdo manut pararem
- b. Mapuwangkid, ngaluputang ayah Desa/ Banjar drawaning mapawangun, mayadnya, matepetin, kaluasan manut pararem
- c. Nyuksukin ayah, sane kadadosang istri yan sampun ngraja suwala utawi sane lanang ngraja singa (yusa 17 warsa)
- d. Nutug ayah antuk artha brana manut pararem
- e. Nyada ngaluputang ayah risampun mayusa 80 warsa, tur sungkan-sungkakan mangda digelis ngangkat sentana miwah tan dados nyuksukin
- f. Sane ngamong utawi ngenahin karang guna kaya sajroning awarsa patut mastikayang panyeledi, yan sajroning pakarang wenten makudang kulawarga, sane tan polih panyeledi kapademang ayahnyane

Pawos 14

Wusan dados Krama Desa utawi Banjar :

- a. Sangkaning magingsir genah saking wawidangan Desa Adat Banda, papamite sangkaning rahayu
- b. Sangkaning kanorayan antuk paruman Desane dawning :
 - 1) Tan prasida ngehehin solah maprawerti arep ring pituduh Prajuru, setate nguwak daging awig-awig
 - 2) Katiwakin pamidanda norane olih Prajuru, manut pararem
- c. Sang wusan makrama :
 - 1) Tan polih pah – pahan saking druwen Desa/ Banjar
 - 2) Ngaturang karang Desa prade sang wusan ngenahin karang Desa
- d. Sang wusan makrama sangkaning kanorayang prade kapungkur mawali ralih keni pamidanda manut pararem

Palet 2

Prajuru Dulun Desa

Pawos 15

- 1) Desa Adat Banda kaenter olih Bendesa Adat

- 2) Banjar utawi Tempekan kaenter olih Kelian Banjar utawi Kelihan tempekan
- 3) Bendesa lan Kelihan Banjar patut :
 - a. Kaadegang malarapan antuk kecatri olih Krama ring paruman nyabran limang warsa, sajawaning wenten parindikan tiyos tur dados kecatri malih
 - b. Mawit saking krama ngarep
 - c. Maduluran Desa Saksi/Pawintenan ring Pura Banjar
 - d. Kelian Banjar lan Kelian Tempekan kaadegang malarapan kacatri olih Krama Banjar lan Tempekanya, nyabran tigang warsa, sajawaning wenten parindikan tiyos tur dados kacatri malih

Pawos 16

- 1) Bendesa Adat kasanggra olih :
 - a. Panyarikan pinaka juru surat
 - b. Patengen
 - c. Kelian Tempekan pinaka wakil Bendesa Adat ring sowing- soang tempekan
 - d. Kasinoman pinaka juru arah
- 2) Sajeroning ngenterang kasukertan niskala, Bendesa Adat mingsinggihang Ida ratu Peranda, Pemangku Kahyangan Desa

Pawos 17

- 1) Swadharmaning Bendesa Adat luwire :
 - a. Ngenterang pamargin sadaging awg-awig, pararem lan pasuwaran Desa
 - b. Nuntun saha ngenterang Krama rawuhin warga Desa ngupadi manut patitis
 - c. Nuntun saha nyaksinin tata cara miwah sangaskaraning kahuripan sane mabuat, mekadi ngilitang sultur pakulawargan
 - d. Maka Dutta Desa, matemuang bawos ring sapisira ugi
 - e. Mawosin kalih niwakang pamutus marep ring wicara warga Desane
- 2) Prade prajuru aswadarma utawi nilar sesana keni pamidanda nikel ring kaiwangan Krama tiyosan manut pararem

Pawos 18

Patias utawi olih-olih Prajuru Desa luwire :

- a. Luput ayah miwah papeson
- b. Olih-olihan tiyosan manut pararem

Pawos 19

- 1) Prajuru Desa kagentosin riantukan :
 - a. Kalayon / seda
 - b. Pinunas ngraga
 - c. Kanorayang olih Krama Desa, duwaning nilar sesana
- 2) Ngentosin utawi nganorayang prajuru mangda sajeroning paruman tur kararemin olih Krama Desa

Palet 3

Indik Kukul

Pawos 20

- 1) Kukul ring Desa Adat Banda luwire :
 - a. Kukul ring soang-soang Pura
 - b. Kukul Desa Adat
 - c. Kukul ring Tempekan
 - d. Kukul Sekaa-sekaa
- 2) Tabuh tetapkan kukul manuti wigunanya luwire :

- a. Tengeran wali ring Pura, nguntit ngawit puja astawa Ida Sang Sulinggih utawi Sira Pemangku
 - b. Tengeran tedun ngayah, atuludan nglambat
 - c. Tengeran / pawiwahan : 9 klentungan
 - d. Tengeran embas rare : 7 klentungan
 - e. Tengeran sinalih tunggil wargane kalayu sekaran tigang klentungan raris ngalambat atuludan
 - f. Ngwangdeang karya tabuh tiga ngempang
- 3) Tengeran bhaya :
- a. Jiwa bhaya mekadi kapet patinya, kabaak, suwaran kulkul tigang tludan bulus
 - b. Artha bhaya minakadi kamalingan utawi kapandangan suwaran kulkul kalih tulud bulus
 - c. Geni bhaya minakadi umah puwun, suwaran kulkul petang tuludan bulus
 - d. Er bhaya minakadi blabar/anyud, suwaran kulkul atuludan bulus
 - e. Lindu bhaya/pawana bhaya suwaran kulkul ngalamat
 - f. Bulan kepangan/surya graha tengerannya nguntit

Pawos 21

- 1) Sahanan kulkul, sawewidangan Desa Adat Banda patut nyarengin katepak prade wenten sinalih tunggil kulkul tengerang bahaya.
- 2) Tengerang kulkul bhaya sekadi pawos 20 angka 3 aksara a, b, c, d lan e, patut katedunin olih sahaning warga saha gegawan manut rupan bhaya.
- 3) Tengerang kulkul makarya, patut katedunin olih ayahan manut daging arahan utawi sasobyahan.
- 4) Kulkul sekaa-sekaa tan patut matahin suka miwah nyawurin sekadi kulkul sajawning tengeran bhaya Desa/Banjar, parde mumurug keni pamidanda manut pararem.
- 5) Kulkul Desa utawi banjar tan wenang katepak yening tan sangkaning pituduh Prajuru Desa sajawaning tengeran bhaya.
- 6) Sang nepak tan sangkaning pituduh patut digelis atur supeksa makabuatan panepaken yan tan sapunika mangkana wenang sang mamurug kadanda manut pararem.

Palet 4

Indik Paruman

Pawos 22

- 1) Luwir parumanring Desa Adat Banda :
 - a. Paruman Desa Adat Banda kawentenang nyabran Buda Kliwon.
 - b. Paruman tempekan tigang rahina sesampun paruman Desa.
 - c. Paruman Prajuru manut wigunanya.
- 2) Sajawaning panamaya pastika paruman Desa, miwah Prajuru ring ajeng taler kawentenang paruman tatkala manut kawigunanya.
- 3) Sahaningparuman madudonan sakadi ring sor :
 - a. Prasida kalaksanayang risampun katedunin olih sang patut ngamiletin maduluran suwaran kulkul saha mabusana nyalempottur tan kengin makta gegawan sakaluwire, tan maren kamanggala antuk ngarcana ring Ida Bhagawan Penyarikan maka srana widhi-widahan care.
 - b. Pengawit kamargiyang ngonekang sepsepan saha riwusnya ngonek dadosan.
 - c. Pamutus kabawos manut pararem kautsahayang malarapan gilik saguluk, prade tan prasida swarane makehan, kamanggehang pamutus.

- d. Tan kalugra ngawetuwang suwara gora/biota, prade wenten asapunika keni pamidanda bea pacamil m,anut pararem.

Pawos 23

- 1) Sajeroning Paruman Desa, Bendesa Adat lan sahaning kelihan tempekan patut nyobyahang sapamargin ngenterang, Desa pamekas nganinin indik :
 - a. Munjuk lungsuringpakraman, makadi ayah-ayahan lan sulur artha brana druwen Desane.
 - b. Rencana prajuru nganinin usaha Desa kapungkur.
 - c. Sahana wicara saha pamutusnya.
- 2) Sahanan pasobyah ring ajeng katitenin saha katiwakin pamutus olih paruman.
- 3) Pamutus paruman Desa sinnaggeh pararem makapamitegep daging awig-awig.

Pawos 24

- 1) Sangkepan Prajuru patut kamiletin olih sahanan Prajuru tur katuntun olih Bendesa Adat.
- 2) Paruman Prajuru kawenangannya wantah ngarincikang pangrencana, usaha Desa kapungkur.
- 3) Sangkepan Prajuru Desa tan Kawenang ngamedalang tategenan ring karma, sadereng kaingkupan olih Krama Desa.
- 4) Pamutus paruman Prajuru mawiwit pituduh sang Mawangrat utawi ngonekang pecak pararem karma Desa sinanggeh pasuwaran Desa Adat Banda.

Palet 5

Indik Padruwenang Desa

Pawos 25

Padruwenang Desa Adat Banda luwire sekadi ring sor :

- a. Kahyangan Desa luwire :
 - 1) Kahyangan tiga makadi : Pura Puseh, Pura Desa/Bale Agung, Pura Dalem lan Pura Prajapati.
 - 2) Pura tumpek lan Pura Batan Sukun.
- b. Palemahan Desa luwire :
 - 1) Karang ayahan lan telajakan desa.
- c. Palaba Pura
- d. Setra Desa Adat tigang paletan.

Pawos 26

Pioli – olihan Desa Adat Banda luwire :

- a. Pioli – olihan saking palaba Pura.
- b. Urunan Krama Desa Adat.
- c. Paica saking Guru Wisesa.
- d. Paica – paica tiyosan sane patut.
- e. Usaha Desa.

Pawos 27

- 1) Prajuru desa wenang ngenterang pamupon Palaba Pura lan sapanunggal druwen Desa.
- 2) Pikoli lan pamuponnya.

Palet 6
Sukerta Pamiteges
Kaping 1
Karang, Tegal lan Carik
Pawos 28

- 1) Sang ngamong karang paumahan patut ngawatesin karangnya antuk tembok utawi pagehan.
- 2) Watese sisi kaler miwah sisi kangin patut kekaryanin olih sang maduwe karang, santukan punika mawastan galengan hulu Tegal paabyanan utawi carik patut magegaleng kateben. Tegesnya sisi kelod miwah sisi kauh patut kakaryanin olih sang madiwe tanah inucap, utawi manut dresta.
- 3) Prade karasayang ngalikadin yening pada arsa panyandinge kengin wates inucap ngengge pinget kemawon kesaksinin olih prajuru.
- 4) Asapunika taler yening wenten karang kablembeng/kabebeng mangda kautsahayang wenten pamarginnya.
- 5) Prade wenten karang embet (tan wenten pemargin toya sabeh) mangda kautsahayang pemargin toya manut paigunan.

Pawos 29

- 1) Silih sinunggil Krama Desa tan kalugra :
 - a. Ngalalah linggih sinanggeh suci luwire : linggih Kahyangan, tegak setra.
 - b. Ngalalah karang paumahan lan tegal utawi paabyanan, margi, telabah.
 - c. Ngembahang toya wit wewalungan, jempeng, ngntungan wangke wewalungan kapekarangan karma tiyosan utawi katelabah miwah margi.
- 2) Prade mamurug kecap ring ajeng angka 1 :
 - a. Manut aksara a,b sang ngelalah patut mecikang miwah kadanda panyangaskara manut pararem.
 - b. Manut aksara c sang ngembahang toya patut nyampetin miwah wangke inucap patut katanem.

Kaping 2
Pepayonan
Pawos 30

- 1) Ngawit nanem pepayonan taneman tuwuh patut adepa agung (2 meter) ngajeroang saking wates :
- 2) Prade wenten manut angka 1 ring ajeng dados kawara olih panyandingnya, tur kasodokang ring Prajuru mangda mituduhin sang madruwe wit punika ngrebah taru inucap. Yan sampun jantos ping tiga nyadokang taler tan karebah taru inucap kengin sang nyadokang ngrebah, kasaksiang olih Prajuru.
- 3) Prade sinanggeh mayanin, sang kajerihan patut atur supeksa ring Prajuru tur risampun kaparitates, mituduhin sang nruwenang wit munggul utawi sanistane nyepat gantungan.
- 4) Yan prade wewangunan jantos karubuhin, sane keni prabeya saha panyangaskara manut pararem.
 - a. Sang nruwenang sinanggeh mayanin prade pepayonan punika sampun kawara.
 - b. Sang notor/munggul ngrebah taru tur ngarubuhin karma tiyos.
- 5) Karma Desa patut ngamanggehang tanem tuwuh sane ngawinang Desane asri.

Pawos 31

- 1) Mungguwing tanah gayang mangda katandruhin pepayonan olih Krama Desa manut wigunanya.
- 2) Sapasira ugi tan kalugra ngrabas pepayon sane sampun maurip ring tanah gayang inucap, patut atur supeksa ring Prajuru.
- 3) Sang mamurug kakenin danda manut pararem.

Kaping 3 Wewangunan Pawos 32

Nyabran wewangunan patut :

- a. Nganggeng sukat asta bumi miwah gegulak astra kosala kosali, sanista manut ring paitits niskala.
- b. Tan kluarga nyayubin karma tiyosan, prade wenten mamurug kecap ring ajeng risampun kasadokang ring Prajuru kakenin pamidanda manut pararem bilih – bilih wewangunan sejeronan wates sanistane mangda kekaryanang abangan.

Kaping 4 Wewalungan Pawos 33

- 1) Sehananing warga Desa sane mamiara wewalungan, patut sayaga nitenin (negul) mangda tan ngarusak karang utawi paabyanan karma tiyosan, bilih – bilih jantos ngranjing/ngaletihin Kahyangan/ Merajan.
- 2) Prade wenten sekadi ring ajeng patut kapelungguhang ring sang madruwe wewalungan inucap.
- 3) Yening jantos ping kalih sampun kapelungguhang ngelantur kasadokang ring Prajuru mangda katiwakin pamidanda sakadi ring sor :
 - a. Ngawaliang wit sane karusak miwah prabeya kapocolan, manut pararem.
 - b. Penyangaskara yening wewangunan jantos ngaletihin Kahyangan utawi Pamerajan, manut pararem.
 - c. Taler wewalungan inucap dados kataban antuk tata cara :
 1. Sang polih naban patut mamiara wewalungan inucap sepatut ipun prada mamurug tan polih prabeya saking sang nuwenang wewalungan.
 2. Sang madruwe wewalungan patut nawur prabeya ring sang naban manut pararem.
- 4) Karma Desa patut nyanggra wewalungan miwah sarwa prani tan kapatut ngamademang paksi miwah nuba ulam.

Pawos 34

- 1) Tan kawenang ngangon ring :
 - a. Palemahan Khyangan utawi ring palebahan setra.
 - b. Ring tanah gayang utawi ring paabyanan Krama siyosan.
- 2) Prade wenten mamurug kakeninin pamidanda manut pararem utawi maduluran panyangaskara yan ngangon ring palebahan khayangan.

Kaping 5 Bhaya Pawos 35

- 1) Parindik bhaya luwire : jiwa bhaya, artha bhaya (kapandangan), duracara ring Agama.
- 2) Sang ngamanggihin kahanan jiwa bhaya patut nepak kulkul pamitulung manut pawos 20 angka 3 aksara a, b sang mayanin patut kadanda sekadi niskala, makadi katiba jampilan panyangasksra.
- 3) Sang manggihin kahanan artha bhaya, patut ngulkul mapitulung manut pawos 20 angka 3 aksara b, utawi sang kapandangan atur supeksa ring Prajuru sane pacing nimbangin tur mutusang ring dusta inucap :
 - a. Sajawining numusang ring sang angawarat, taler ngeninin pamidanda ngwaliang barang kapandung.
 - b. Pamidanda nikel yan prade taler mamaling/ ngamalaing lintangan ring apisan.
 - c. Maweh panyangaskara manut pararem prade ngamaling barang sinanggeh suci.
- 4) Prade wenten karma sane nguman – uman ring Prajuru utawi karma tiyos kakeninin pamidanda manut pararem.
- 5) Prade desane kahanan jiwa bhaya, patut Desane ngaturang Bhuta Yadnya.

Pawos 36

- 1) Sang manggihin wenten geni bhaya patut ngulkul mapitulung manut pawos 20 angka 3 aksara c muah katedunin olih sahanan Krama saha makta gegawan manut kahanan bhaya.
- 2) Sang dura cara ring agama kacihna antuk tripremana (saksi, ilikita, bukti) wenang jadma inucap kadanda manut pararem.
- 3) Prade wenten jadma mamisuh utawi ngunan jadma tiyos, kakenanin pamidanda, bahaya pacamil manut pararem.

Kaping 6

Panyanggran Banjar

Pawos 7

- 1) Rikala ngawangun Yadnya suka duka, dados nunas kakaryan Banjar upami : sajeroning pitra Yadnya, Manusa Yadnya, ngingsirang wewangunan, utawi sane sewosan manut pararem.
- 2) Panyanggran Banjar kamargiang manut dresta miwah pasuwaran tempekan suwang-suwang.
- 3) Karma Banjar katurin panyangu manut wibuh kincit upakarnya manut pararem.

SARGA IV

SUKARTA TATA AGAMA

Palet 1

Indik Dewa yadnya

Pawos 38

- 1) Palingih panyiwian sawidangan desa adat Banda luwire:
 - a. Kahyangan tiga : Pura Desa Bale/Agung, Pura Puseh, Pura Dalem.
 - b. Kahyangan Jagat :
 1. Pura Tumpek
 2. Pura Batan Sukun
 3. Pura Prajapati
 4. Pura Ratu Banjar
- 2) Rahina piodalan (Pujawali) Soang-sowang Kahyangan inucap kadi ring sor:
 - a. Ring Kahyangan tiga luwere :

1. Pura Desa/Bale Agung rikala rahina buda Wage Merakih.
 2. Pura Puseh rikala rahina Buda Umanis Tambir.
 3. Pura Dalem rikala rahina nemoning Tilem Wusan Kuningan.
- b. Pura Kahyangan jagat luwere :
1. Pura Tumpek rikala rahina Caniscara Kliwon Krulut.
 2. Pura Batan Sukun rikala rahina Caniscara Kliwon Krulut.
 3. Pura Prajapati rikala rahinanemoning Tilem Wusan Kuningan.
 4. Pura Ratu Banjar rikala rahina Sukra Umanis Menail.
 5. Nemoning sasih ke 5, ke 6, ke 7 Ida Bathara Kahyangan Tiga Katurang ngadeg saking angina ring suwang – suwang payogan Ida Bathara Panataran taler ngadeg saha ngunya ring catur pata miwah pananggu Desa, kesanggara olih karma Desa satunggil ngwarsa karma banjar ngaturang piodalan ring Penataran manut pararem.
- 3) Pangaci ring Pura-pura inucap manut kecap sastra agama saha kalaksanayang nista, madya, utama manut kawentenan lam pararem.
- 4) Pangempon soang-soang Pura manut dresta sekadi ring sor :
- a. Kahyangan Tiga : Pura Desa/Balai Agung, Pura Puseh, Pura Dalem kaempon olih Krama Desa adat. Pamargin pangaci kalaksanayang olih tempekan saha magilir.
 - b. Pura Kahyangan Jagat : Pura Tumpek, Pura Batan Sukun, Pura Prajapati, Pura Ratu Banjar kaempon olih Krama Desa Adat Pamargin pangaci kalaksanayang olih tempekan saha magilir.
 - c. Pura panataran kaempon olih Pemaksana, pamargin pangaci pura inucap kalaksanayang olih pemaksana.

Pawos 39

- 1) Ring suwang – suwang Pura inucap patut kaadegang Pemangku.
- 2) Ngadegang Pamangku manut dudonan :
 - a. Turunan utawi ngawaris.
 - b. Nyanjan.
 - c. Kacatri olih Krama Desa Adat.
- 3) Tan kawenang anggen Pamangku luwire :
 - a. Cedangga minekadi : peceng,perot, cingih, lan sapanunggilanya.
 - b. Sang sapa sira ugi sane tampakan manut pararem.
- 4) Prebeya kapamangkuan:
 - a. Adiksha Widhi pawiwahan kamedalin saha kalaksanayang olih sang ngadegang, sekadi Krama Desa Adat utawi pangempon Pura suwang-suwang.
 - b. Mapitra yadnya riwekas kasungkemin antuk Krama Desa utawi pangemong sanistana Brahma prayascita pengambilane manut pararem, pangingune manut pararem.
 - c. Pangingune manut pararem prade Yadnya inucap kalaksanayang olih warga sira mangku.
- 5) Pamangku patut ngamargiang sesanan pemangku luwire :
 - a. Ambek darma sadu.
 - b. Aswaka Darma.
 - c. Tan parek ring naya dusta.
 - d. Tan atayubring tarub camara yudha.
 - e. Tan manjing ring umah wong baija karma.
 - f. Tan majing ring umah wong drati karma.
 - g. Tan pati salah – suluh, salab – sulub.
 - h. Tan anginum asing angawe mada.
 - i. Tan pati pikul – pikulan.
 - j. Tan keneng cuntakan won len sajawaning kacantukan tunggal natah miwah pasuwatran nyane.
 - k. Tan griganing wang akeh.

Pawos 40

Swadarmaning Pamangku luwire :

- a. Ngeterang upacarapiodalan (puja wali) ring Kahyangan utawi ring suwang – suwang pakuuban Krama.
- b. Prade salah sinunggil Pemangku kapiulangan utawi cuntaka, kengin nguntap Pemangku Kahyangan Desa sewoman utawi nuur sang Sulinggih.
- c. Salah sinunggil yen wenten Krama ngipik – ngipik saparipolah Pemangku, yan tan sujati asapunika sang ngipik – ngipik wenang mrayascita Pemangku inucap manut pararem.
- d. Semaliha yan sampun Pemangku ngayah ring Pura, kancit wenten kulawarganya seda, Pemangku inucap tan kenen cuntaka, sakewenten Pemangku tan budal salami piodalan.
- e. Pemangku keni cuntaka yening wenten padem sajeroning pekarangannya suwenya selama limang rahina, yan paguruanya keni cuntaka tigang rahina.

Pawos 41

Patias utawi olih – olih Pemangku luwire :

- a. Sarin canang miwah olih – olih ring pura manut pararem.
- b. Upon palaba carik miwah tegal wit ngaryanin mamungkul.
- c. Luput rerampean lan padagingan.
- d. Pioli – olihan tiyosan manut pararem.

Pawos 42

Pemangku kagentosin riantukan :

- a. Seda
- b. Pinunas manawi kageringan lan sapaninggalanya.
- c. Kawusanang olih Krama Desa Adat sangkaning malaksanan sane tan patut miwah mamurug sesananing Pemangku.
- d. Prade Pamangku kawusanang sangkaning melaksana tan patut Pamangku inucap patut ngewaliang prabeya pawintenanya pecak.

Pawos 43

Kasukertan Kahyangan kadi ring sor :

- a. Tan kluarga ngeranjing ka Pura luwire :
 - 1) Sang katiban cuntaka.
 - 2) Makta sahaning barang sane sinanggeh ngaletihin.
 - 3) Sato ageng sajawaning kalaning mapapada.
 - 4) Mabusana tan manut kadi tata caraning ngeranjing ke Pura.
 - 5) Sedereng polih wak wakan saking Prajuru.
- b. Pratingkahe tan wenang ring Pura :
 - 1) Masumpah (cor) sajawaning pituduh Prajuru.
 - 2) Makobetan, mawyawahara, makolem dados asiki lanang wadon, mabacin, mawarih, nyangsang busana, menahin pusungan, macecepin rare.
- c. Sang manurug kecap ring ajeng keni pamidanda mrayasoita manut pararem.

Pawos 44

- 1) Pradejadma karawuhan utawi kalinggihan ring Pura tur dados kapintonin prade kasumbangsan yan tan jati jadma inucap karawuhan, patut kasisipang tur pamrayascita sepatutnya manut pararem.
- 2) Prade Kahyangan kahanan durmanggala, utawi keni bhya Pemangku utawi sang manggihin gelis nyadokang ring Prajuru selanturnya gelis – gelis marumang Krama Desa Adat tur ngawentenang pamrayasoita sepatutnya.

Palet 2

Indik Resi Yadnya

Pawos 45

- 1) Sane pacang madeg Pandita utawi Pinandita minekadi Balian senteng, Kubayan, Dalang, sakaluwire sane jagi ngenterang Yadnya, patut nguningayang/masadok ring Prajuru utawi Parisada Hindu DharmaIndonesia.
- 2) Prajuru patut ngawas, nitenin tur wenang ngalanganin prade wenten kacihnaan sasar sasana miwah drestane tur sareng nyaksinin upakara saha nyobyahang ring Paruman Desa tegep rawuhing wates kawenanganya muput Yadnya.
- 3) Pandita (Sang Sulinggih) :
Karma Desa Adat patut ngaturang ayah sapemadeg miwah pangelepas sang Sulinggih riwekas katuntun olih Prajuru.

Pawos 46

- 1) Sang Sulinggih utawi Pinandita, patut ngariyiningmuputang Yadnyaring wewidangan Desa Adat Banda.
- 2) Karma Desa Adat sami patut ngawas nitenin katuntun olih Prajuru mangda sahanan Yadnya sane kawentenang kaicen pamuput olih Pandita utawi Pinandita manut kawenanganya suwang – suwang.

Palet 3

Indik Pitra Yadnya

Pawos 47

Pamargin Pitra Yadnya manut dudonan sakadi ring sor :

- a. Pangupakara sang kalayu sekareng :
- b. Upakara Pitra Yadnya riwusan kaabenan/palebon ngelantur munggah daun bingin (ngaroras)
- c. Yan wenten prade salah pati lan ulah pati upakaranipun pateh sekadi upakara sang padem biasa, sakewanten ngawewehin Yadnya pangulapan ring genahe kalepetan miwah ring pempatan agung.
- d. Yan prade wenten sinalih tunggil warga sane keni sungkan ila punika padem kapadem, pamargin upakara pateh sekadi padem biasa.
- e. Rikala upakara atiwa – tiwa (pengabenan) warga sane sungkan ila punika dados kaabenan, pamargin upakara sawa tigang paletan inggih punika ring jaba setra, ring pempatan, ring setra.
- f. Sadereng tutug senger kapatutan palebon, prade wenten pacang malebuang nutug dewasa dasa patut ngemargiang upacara panebasan pakingsan.
- g. Sang sane makingsan ring geni abunya dados pendem utawi dados kaanyut, prade pacang nutug palebon manut padewasan Desa patut nebasin. Panebasanyane manut dresta Desa Adat Banda.

Pawos 48

Swadarmaning lan tategenan prade wenten sinalih tunggil Krama Desa Adat kalayu sekaren

- a. Sang kaduh kitan patut :
 - 1) Nyadokang ring Kelihan/Bendesa tur nunas tatimbang ring kawentenanya, raris Kelihan nganikain Kelihan tempekan.
 - 2) Ngaturin Banjar ngaremba apuputan pamargin upakara manut pinunas sang kaduhkitan nyantos nganter ka setra, panyebamane ring Banjar sasidan – sidan.
- b. Swadarmaning Banjar/Desa :
 - 1) Kelihan Banjar maritetes pamargin sang kaduhkitan napike :
 - Kapendem (mekingsan)
 - Kaabenang/kaplebon.
 - 2) Risampun kaparitas, pamargi kelihan nguningayang ring Bendesa Adat.
 - 3) Prade kapendem, raris kawentenang kulkul pamitahu kalayu sekaran pinake pawungu pamargin Banjar.
- c. Panyanggran Banjar selanturnya :
 - 1) Suwang – suang Krama Banjar micayang padanannabing.
 - 2) Ngaremba ngaryanin upakara apuputan manut pinunas sang kaduhkitan saha kasarengin olih Krama sane rauh utawi sane maaksian.

- 3) Sami Krama Banjar nganter kasetra jantos pamendeman puput.
 - 4) Tan dados ngalelet (nyekeh) langkungan ring pitung harina sajawaning pacang pacang kapelebonang, utawi pamangku.
 - 5) Tan dados mendem rikala :
 - Pasha, Was panganten, Prawani, Purnam/Tilem.
 - Kejeng Kliwon, Ingkel Wong, Semut Sedulur, Kala Gotongan.
 - Rerainan jagat.
 - 6) Tan dados nginepang bambang.
- d. Kalayu sekaran tan kapadem patut kaabenan/kapelebon luwire :
- 1) Ida Pedanda (Sulinggih) lanang istri.
 - 2) Pemangku lanang istri.
 - 3) Karma Banjar wenten sinalih tunggil padem rikala kalaksanayang pangambilan upakara palebon Ida Pedanda/Pemangku kadadosang ngiring.
- e. Pamargin patus kalayu sakaran :
- 1) Pelebon Ida Padanda (Sulinggih) Pemangku Kahyangan Desa lanang istri prebeya kasungkemin olih Banjar sinamian nyantos apuputan upakara.
 - 2) Karma Banjar padem dadakan, rikala kalaksanayang upakara palebon kedadosang ngiring sakewanten tan kapidayang patus saking Banjar.
 - 3) Karma Banjar sane kacatri ngamel jagat (Prajuru) prade kapalebonang polih patus dadakan manut dudonan lan pararem.

Pawos 49

- 1) Sane kasinangguh kacuntakan sekadi ring sor :
 - a. Cuntaka antuk kalyu sakaran.
 - b. Cuntaka antuk ngraja swala.
 - c. Cuntaka antuk ngembasang putra.
 - d. Cuntaka antuk karuron.
 - e. Cuntaka antuk sakit ila, buduh.
 - f. Cuntaka antuk pawiwahan.
 - g. Cuntaka antuk gamia – gamana.
 - h. Cuntaka antuk salah timpal.
 - i. Cuntaka yening wenten anak istri mobot nenten kaupakarain antuk pabyakawon miwah pawidhi –widana (pamerasan).
 - j. Cuntaka antuk mamitra ngalang.
 - k. Cuntaka yening wenten anak istri ngawetuang putra sadurung kaupakara mabyakala miwah mawidhi – widana (pemerasan).
 - l. Cuntaka antuk Sad Atatayi.
- 2) Sengker cuntaka manut kawentenanya :
 - a. Cuntaka kalayu sakaren : cuntakannya manut dresta.
 - b. Cuntaka ngraja swala, tigang rahina ngawit ngraja swala utawi salama ngraja swala.
 - c. Cuntaka ngembasang putra, asasih pitung rahina, ngawit saking putrane embas utawi nyantos sampun kaupakarain makambuhan tur maprayascita manut sastra Agama, lanang wiadin istri.
 - d. Cuntaka antuk akruron asasih pitung rahina tur sampun matirtha pamrayascita.
 - e. Cuntaka antuk sakit ila lan buduh salama kacihnan pinyungkannyane.
 - f. Cuntaka antuk pawiwahan nyantos sampun matirta pabyakawonan.
 - g. Cuntaka antuk gamia gamana cuntakanya nyantos sesampune mepalasan/masapiah tur sampun kawentenang pamrayascita raga lan Desa Adat.
 - h. Cuntaka salah timpal kamargiang manut sastra Agama, pamrayascita raga lan Desa Adat.
 - i. Cuntaka anak istri mobot nenten kawentenang upakara pabyakawonan nyantos kawentenang upakara mabyakawon.
 - j. Cuntaka mamitra ngalang cuntakanya nyantos kawentenang upara pabyakawonan.
 - k. Cuntaka ngembasang putra nenten kawentenang upakara pabyakawonan, pawidhiwidana, cuntakanya nyantos wenten sane mameras lan sampun kawentenang upakara sekadi manut sastra agama.

1. Cuntaka Sad Tetayi, nyantos sampun mrayascita raga, tur nenten dados pisan ngunggahang upakara padwijatiaan.
 - 3) Cuntaka kalayu sekaran kapademan :
 - a. Kapademan cuntakanya :
 - Sebel Banjar : tigang rahina.
 - Kulawarga :
 - 1) Sang ngarepin : asasih pitung rahina.
 - 2) Sameton pakuwuban (pedadian) pitung rahina.
 - 3) Mingsiki : 12 rahina.
 - 4) Mindon nem rahina.
 - b. Kaaben/kapelebon :
Sang nyambut karya Pitra Yadnya cuntakanya ngawit saking nyambut padewasaan nyantos mapegat kalanturang malih tigang rahina.
 - 4) Sane katiban cuntaka luwire :
 - a. Kalayu sekaren kapademan :
 - b. Ngraja swala sane kacuntaka sang sane ngraja swala.
 - c. Ngembasang putra, sane kacuntakan kulawarganya sami manut pararem.
 - d. Karuron sane kacuntaka kulawarganya lanang istri.
 - e. Sakit ila, buduh sane kacuntakan raganya ngeraga.
 - f. Pawiwahan, sane kacuntakan sang ngelaksanayang pawiwahan.
 - g. Gamia gamana sane keni cuntaka sane ngelaksanayang gamia gamana lan Desa Adatnyane.
 - h. Salah timpal manut sekadi sastra agama/sane melaksana lan Desa Adatnyane.
 - i. Anak istri mobot nenten kawentenang upakara pabyakalaan sane keni cuntaka sang sane meraga istri.
 - j. Mamitra ngalang, sane keni kacuntakan, sane ngelaksanayang mamitra ngalang punika.
 - k. Anak istri ngawentenang putra, sadurung mabyakawon sane keni kacuntakan anak istri sane ngawentenang putra miwah putranya.
 - l. Sad tetayai, sane keni kacuncatan sang sane ngelaksanayang Sad Tetayai.
 - 5) Tan keneng cuntaka luwire :
 - a. Sang sulinggih lanang istri .
 - b. Pemangku lanang istri
 - c. Bendesa adat
 - d. Rikala piodalan risampun ngalang sasih.
- Sajawaning kulawarganya tunggil natah/umah keni cuntaka manut dresta.

Pawos 50

- 1) Atiwa-tiwa (pangabenan) kalaksanayang sekadi ring sor :
 - a. Sawa Preteka.
 - b. Nyawa rsi/Pranawa: inggih punika nenten mrateka sawa.
 - c. Swastha santukan nenten ngagah utawi sawa tan kakeniang.
- 2) Panemayan Pengabenan ring Desa Adat Banda kalaksanayang ngaben ngamasa pararem, sajawaning Sang Sulinggih lan Pamangku.
- 3) Dudonan pangabenan: ngawit saking ngawangun (ngangkid) nyantos pangabanenanya.

Pawos 51

Pamargin Patus pangabenan :

- a. Ring Desa Adat Banda wenten kalaksanayang pangabenan ngamasa rikala kalaksanayang pangbenan suwang-suwang karma banjar ngamedalang patus manut pararem, sajawaning Pindita/Pinandita.
- b. Pengu ring Banjar manut dresta, tata karma, sila karma, sima karma miwah pararem.

Palet 4
Indik Manusa Yadnya
Pawos 52

- 1) Manusa Yadnya inggih punika upakara-upakara dharmaning kamanusa ngawit saking patemuan alaki rabi, pawiwahan saha patemoning kuma petak kalawan kama bang sajeroning garba ngantosang kalayu sakaran riwekas.
- 2) Upakara ring ajeng madudonan sekadi ring sor :
 - a. Abyakala
 - b. Magedong –gedongan, duk pangrompiyan (garbha dhana)
 - c. Duk sang kama reka medal (jata karma)
 - d. Kepus odel.
 - e. Roras rahina.
 - f. Tutug kambuhan utawi asasih pitung rahina.
 - g. Nigang sasihin (nelubulanin), (niskarmana).
 - h. Pawetuan utawi otonan (ngenem sasaih).
 - i. Tutug kelih (ngraja swala wadone, ngembakin lanange).
 - j. Metatah (mapendes).
 - k. Mawiwaha.
 - l. Mawinten.
- 3) Upakara – upakara inucap :
Nista, madya, mautama, manut Sastra Agama lan Sima Krama Desa Adat Banda.

Palet 5
Indik Bhuta Yadnya
Pawos 53

- 1) Bhuta Yadnya inggih punika upakara – upakara pabyakala ring pertiwi lan kahyangan sarwa prani miwah caru duang piranti sewosan saha upakara - upakara ring babhutan.
- 2) Upakara pabyakala ring sarwa pranai luwire :
 - a. Ring sarwa tumuwuh rikala Tumpek Pengatag utawi rahina saniscara Kliwon Wariga.
 - b. Ring sarwa ingon – ingon/ wewlungan, rikala rahina Tumpek Kandang (rahina Saniscara Kliwon Uye).
 - c. Ring sarwa lelandep (pusaka) rikala Tumpek Landep utawi Saniscara kliwon wuku Landep.
 - d. Upakara lelanguan, (tetabuhan) ring Tumpek Krulut (Saniscara Kliwon wuku Krulut).
 - e. Ring rahina Tumpek Kuningan upakara ling palinggihan utawi siandana, (Saniscara wuku Kuningan).
 - f. Upakara payakalan manusia manut wigunanya kabawos pabayakalan.
- 3) Upakara pabyakala ring pertiwi lan bhabutan kawastanin macaru.
- 4) Pacaruan inucap :
Nista, madya, utama manusa wiguna manut kadi ring sor:
 - a. Eka Sata
 - b. Panca Sata
 - c. Resigana
 - d. Panca Kelud
 - e. Panca Sanak
 - f. Tawur Agung
- 5) Sajawaning kadi ring ajeng kawentenang upakara :
 - a. Mesaiban utawi yadnya sesa nyabran wusan ngarateng.
 - b. Masapuh-sapuh rikala pacang wali ring Pura naler ngaturang Piodalan ring pamerajan Panti, Pedadian suwang-suwang.
 - c. Rikala kerauhin linuh/gejor carunia manut sasih.

- d. Karubuhan bilih – bilih taru lan sakancan ipun sami rubuh utawi pungkut jantos neteh wewangun siosan, carunya manut sastra agama.
- e. Ngingsirang tanah wit ring pakarangan sane ampun kadruwenang saha sane sampun nenten maupakara carunya manut sastra agama.
- f. Caru pasasihan kamargiang ngawit sasih kalima, kenem, kapitu, kaulu nyantos kasanga.
- g. Siosan ring punika pemarginya manut wiguna.

Pawos 54

- 1) Nyabran ngamasa rikala tilem kasanga kawentenang Tawur Kasanga makecihna pacang mapag rahina panyepian benjangne.
- 2) Pamargin sajeroning Tawur Kasanga kalanturang antuk pangrupukan sekadi ring sor :
 - a. Ring perempatan Desa Adat, kamargiang Bhuta yadnya, bobot pawilangan Panca Sata kadulurin wewalunganya tik welang kalung ring tengah, asu bang bungkem ring daksina (kelod) miwah manut wigunanya.
 - b. Suwang –suwang Puri atawi paumahan :
 - Ring pemerajan : sanggah Kemulan ngamuggahang pejati ajangkep saha pasucian, canang lenge wangi, burat wangi, muang segehan ring natar pemerajan, 108 tanding, nasi sasah, ulam jajeron matah.
 - Ring pamedal jaba nancebang sanggah cucuk saha Yadnya pejati Perasdaksina, tumpeng danan, megantungan, tipat kelanan, ulanya olahan ayam berumbun, ring sor segehan 9 warna ulanya bawang jahe, tetabuhanipun arak, berem, tuwak, yeh.
- 3) Brata penyepian sane kamargiang antuk Krama Desa Adat Banda :
 - a. Amati geni, tan dados maapi- api.
 - b. Amati karya tan dados nyambut karya.
 - c. Amati lelanguan tan dados maomang-omangan.
 - d. Amati lalungan tan dados malancaran.
- 4) Pabratan inucap kamargiang sakeng nyantos semeng benjange.
- 5) Sang mamurung patut keni pamidanda manut pararem.

SARGA V

SUKERTA TATA PAWONGAN

Palet 1

Indik Pawiwahan

Pawos 55

- 1) Pawiwahan inggih punikan patemoning purusa pradana malarapan panunggalan kayun suka lila kadulurin upasaksi sakala niskala.
- 2) Pamargin/pelaksanaan pawiwahan luwire :
 - a. Pepadikan kamanggala antuk pakrunayan.
 - b. Ngarorod, marangkat riyin wawu kakrunayang.
 - c. Nyeburin utawi Santana nyeburin risampune nganutin upakara pamerasan.
- 3) Pidambdab sang pacang mawiwaha patut :
 - a. Sampun manggeh deha truna (prasida nganutin undang – undang).
 - b. Sangkaning pada lila (tan kapaksa).
 - c. Nganut kecap Sastra Agama (tan gamia gamana).
 - d. Prade pangambile siyos agama, kamanggala antuk sudiwardani riyin wawu kawentenang upakara agama Hindu.
- 4) Pamargin pawiwahan mangda taler nganutin undang – undang perkawinan saking sang ngawarat.

Pawos 56

- 1) Pawiwahan sane kapatutang ring Desa Adat Banda sekadi ring sor :
 - a. Sampun kamargiang pabyakala, lan pasakapan kasaksiang sakala niskala olih Pandita utawi Pinandita.
 - b. Wenten pasaksi Prajuru mapakelingan utawi ngilikitayang pawiwahan.

- c. Sampun matengeran suwaran kulkul.
 - d. Pawiwahan inucap ring ajeng sampun kilikitayang ring sang ngawerat.
- 2) Parabian sane tan manut sekadi ring ajeng sinanggeh tan patut (tan sah).

Pawos 57

Tatacaraning parabian patut sekadi ring sor :

- a. Sapa sira ugi pacang ngwarangan pakulawarga patut masadok ring Prajuru, selanturnya Prajuru maritatas tan manut pamargin pawiwahan.
- b. Pamargin papadikan manut dudonan :
 - 1) Pakrunayang jantos ping tiga, saha malarapan.
 - a. Kapratama antuk canang pangrawos.
 - b. Kaping kalih antuk canang pangrawos lan daksina.
 - c. Kaping tiga antuk daksina lan pasaluk wastra arangsukan.
 - 2) Risampun puput raris sang istri kaajak budal kapakuban sang lanang, saha kalanturang antuk pabyakala.
 - 3) Mangda puput tumus skala niskala raris kulawarga purusa makta pejati ring sanggah/merajan wadon.
- c. Prande ngarorod/ngarangkat patut :
 - 1) Reraman lanange ngawentenang pamilaku panyadok antuk dutta sakirangnya 2 (kalih) diri.
 - 2) Pagenahan antene tan wenang/kengin ring pakuban sang lanang sadereng mabyakala.
- d. Sajeroning pakruyunan, panglukuan patut :
 - 1) Kamanggala antuk geng pangampura arep ring rerama wadon.
 - 2) Kaigumang bawos indik kaindik utawi palemegayan arep ring pasewakan sang ngidih saha dewasa pakrabkambeyan riwekas.
 - 3) Kacihnayang indik kapurusa utawi prade Santana rajeg karajegang, kapatut ngidih anak lanang sane kabawos pawiwahan nyeburin tur malarapan salur pamerasan kategepin kamanggehang sentana nyeburin.
 - 4) Prade tan terima pejati (panyeken) pakrunayan kamargiang jantos ping tiga.
- e. Pakerabkambeyan mapitetes upakara tunas apadang (puput) mapikuren dawning manut sekadi ring sor :
 - 1) Sajeroning kabawos ambek kalaksanayang ring sakala niskala pakulawargan wadon :
 - a. Jajauman pindaka ngambek/ngadungang kayun sowing – sowing pakulawargan wadon.
 - b. Widhi widhana pinaka pajati niskala nunas wadone ring pamerajan/sanggahnya.
 - 2) Sajeroning bawos pakerab pelaksana ring sekala :
 - a. Antuk panyaksi Krama Banjar, dawning kakeraban antuk tengeran kulkul.
 - b. Pamekas penyaksi Prajuru, sane ngilikitayang.

Pawos 58

- 1) Pawiwahan prasida kawusang malarapan antuk palas parabian utawi kapademan.
- 2) Wusan mapakurenan riantukan salah sinunggil seda mapiteges balu makadi balu lanang/istri.
- 3) Palas merabian wenten kalih pawos inggih punika.
Sangkaning pada lila miwah mawiwit wicara.
- 4) Sang palas marabian patut atur supeksa pilikitan riyang ring sang rumawos, wastu tinas apadang pamutuse kabawos nyapian, wawu Prajuru nyobyahang kawentenanya ring Desa, saha kakenanin panebas suwaran kulkul manut pararem.

Pawos 59

- 1) Tata caraning palas parabian nganutin kadi undang – undang perkawinan saking sang Ngawiwenang.
 - a. Silih sinunggil nenten prasida ngalaksanayang swadarmaning alaki rabi.
 - b. Matilar tan pasadok jantos 6 sasih.
 - c. Tan prasida adung malih.

- 2) Yan wicara katumusang olih wadon, makecihna :
 - a. Lanang drati karma.
 - b. Wandu.
 - c. Tan nyanguin tur ngupajiwain jantos 6 sasih.
- 3) Yan wicarane katumusang olih lanang patut :
 - a. Istri paradara utawi nyasar lakunya.
 - b. Istri amandel senggame (kuming)
 - c. Istri ceda angka.
- 4) Prade manut tri premana sang mawicara inucap angka (2) miwah (3) :
 - a. Parabian kengin kapalasang.
 - b. Keni pamidanda manut pararem.

Pawos 60

Tata caraning palas parabian sangkaning pada lila sekadi ring sor :

- a. Naur prabeya pasaksi sinalih tunggil, sami matangga manut pararem.
- b. Pagunayan polih pahan pada.
- c. Pabekel tadtadan sowing – sowing kakuasa niri – niri miwah warisan kakuasa olih purusa.
- d. Ngaweruhin miwah ngupajiwain pratisantana manut swadarmaning guru rupaka.
- e. Naur pamidanda panebas suwaran kulkul manut pararem.
- f. Ngelung jinah logika Prajuru.

Pawos 61

Prade riwekas sang palas marabian kacihnayangadung malih patut :

- a. Ngalaksanayang pawiwahan malih.
- b. Kadanda nikel saking palase, yadiastun palase pecak sangkaning pada lila manut pararem.

Pawos 62

- 1) Sang balu kabinayang dados :
 - a. Balu luh wit Santana (Santana rajeg) miwah balu boya sentana.
 - b. Balu muani kapurusa (wit Santana) miwah balu muani nyeburin, boya santana.
- 2) Swadarmaning balu inucap patut :
 - a. Ngamanggihang pati brata, tan dados ngamargiang paradana/dratikrama.
 - b. Ngwasayang waris pagunakaya tan dados ngadol, ngadeang, makidihang lan siyosan punika, sajawaning kabebasan saking pianak utawi kaluarga pinih tampek saking kurenanya, prade pianak kantung alit – alit.
 - c. Kengin ngidih sanatana prade wenten pidabdab sadurung sinalih tunggil padem/seda, saha kabebasan olih purusa.
 - d. Kawenangan mawiwaha malih, prade wenten kaluarga kabebasan manut angka (2) aksara b, c.

Pawos 63

Balu kaucap tan pageh sekadi ring sor :

- a. Dratikrama utawi paradara.
- b. Matilar saking pakuban tan pasadok jantos 6 sasih.
- c. Lempas ring swadarmaning seyos – seyos, tan prasida ngehehin solah, maprawerti, arep ring pituduh saking sane patut kulawarga purusa.

Palet 2

Indik Santana

Pawos 64

- 1) Santana wenten kalih pawos :
Santana kaucap pratisantana miwah Santana paperasan.
- 2) Pratisantana inggih punika Santana sane metu saking pawiwaha kapatut.
- 3) Prade pawiwahane tan kapatut ngawetuang Santana, mangda tan kawastanin babinjat utawi astra, yogya kamanggala antuk panyangaskara (lan paperasan).
- 4) Prade pawiwahane tan ngamatuang Santana, kengin ngidih Santana antuk pesaksi sakala niskala sane kawastanin santana paperanan.

- 5) Santana rajeg inggih punika pratisantana wadon (pradana) sane kamanggehang lanang (purusa) tur risampun ngalaksananya pawiwahan nyeburin.
- 6) Sang sane dados karsayang Santana rajeg inucap wiwit (5) inggih punika :
 - a. Pratisantana wadon tunggal.
 - b. Sampun kamanggehang dados pratisantana lanang (purusa).
 - c. Kapawiwahan kaceburin kautamayangantuk jadmā sane maagama Hindu utawi jadmā sane maagama tiyosan sane sampun ngalaksananya pamarisuda raga utawi sudiwadani.
 - d. Sane ngamanggehang Santana rajeg patut masadok ring Prajuru Banjar tur Kelihan Banjar patut nyobyahang ring Banjar saha ngaturang ring Prajuru Desa Adat, sane numusang ring sang Rumawos.

Pawos 65

- 1) Pamerasan sane kapatutang ring Desa Adat Banda risampun makacihna sakadi ring sor:
 - a. Widi widana pamerasan.
 - b. Kasaksinin olih Prajuru Desa sane makelingan saha polih ilikita saking sang rumawos (sang ngawiwenang).
 - c. Kasobyahang ring wawidangan desane.
- 2) Sane patut kaperas angge Santana kadi ring sor :
 - a. Jadmā maagama Hindu.
 - b. Papernahang nedunang saking sang meras.
 - c. Kulawarga saking purusa, prade tan wenten kangin saking wadon yening taler tan wenten wawu kengin sakama – kama (saking kayun).
 - d. Kautamayang saking waris pancer kapurusa.
 - e. Sinalih tunggil mawiwit saking kulawarga tunggal sanggah utawi merajan paibon lan dadia utawi ngambilin anak tiyos sakewanten sang maagama Hindu.
- 3) Kengin ngangkat sentana langkung ring asiki, lanang wiadin wadon.

Palet 4

Indik Warisan

Pawos 66

- 1) Warisan inggih punika tatamian harta brana saha ayah – ayahan ngupadi sukerta sakala niskala saking kaluhuranya arep ring turunanya.
- 2) Sane kasinanggeh waris luwire :
 - a. Duwe tengah makadi tegal ayahan desa hutang piutang Pusaka siwa karena.
 - b. Pamerajan.
 - c. Pagunakayan, tadtadan/jiwa dana, hutang piutang.
- 3) Wawu kengin kabawos warisan prada wenten :
 - a. Sang mapiturun (pawaris).
 - b. Katurunan (ahli waris).
 - c. Arta brana miwah tategenan (ayah-ayahan makacihna warisan).

Pawos 67

- 1) Ahli waris luwire :
 - a. Pratisantana purusa.
 - b. Pratisantana pradana (Santana rajeg)
 - c. Sentana paperasan lanang/wadon.
- 2) Prade tan wenten sakadi ring ajeng sane sinanggeh ahli waris :
 - a. Turunan pernah ngunggahang, rerama lanang, pekak, selantur ipun rerama misan mindon.
 - b. Turunan purusa pernah kesamping, makadi kaponakan, misan utawi mindon.

Pawos 68

Swadarmaning ahli waris patut :

- a. Nerima saha ngawasayang tetamian pahan saking kaluhuranya, mekadi ngarempon sanggah, pura saha pangupakaranya, miwah nyeledihi ayah – ayahan sang mapiturun (pawaris).
- b. Ngabenang pawaris saha ngalanturang upakara – upakara pitra.
- c. Nawurin hutang – hutang pawaris saha manut pangelokika.

Pawos 69

Pangepahan waris manut kadi ring sor :

- a. Risampun kalaksanayang Pitra Yadnya lan hutang – hutang pawaris buntas katawur.
- b. Para ahli waris polih pahan pada sangkaningpagunakayan. Sajabaning karang/tegal ayahan desa kaamong olih ahli waris kang sinanggeh karma ngarep.
- c. Sinalih tunggil ahli waris kengin tan polih pahan prade :
 - 1) Nilar kawitan lan sesananing Agama.
 - 2) Sasana rajeg kesah mawiwaha, utawi nyantana nyeburin sowing –sowang kabawos ninggal kadaton.
- d. Boya ahli waris kengin muponin upon anut dudon luwire:
 - 1) Sentana luh, salami dereng kesah mawiwaha utawi tan alpaka guru rupaka, prade maderbe pianak tan kangkenin olih wong tua, rare inucap kengin ngawaris wantah polih (pagunakayan) Santana luh inucap kewenten.
 - 2) Balu luh wiadin muani nyeburin (suwang-suwang boya Santana)
 - 3) Mulih deha utawi truna riantukan ring pawiwaha pecak sampun kabawos ninggal kadaton.
- e. Pawaris kengin maweweh rikala maurip pinake jiwa dana, tadtadan/bekel makecihna paweweh tetep ring pianak sane kesah mawiwaha.

Pawos 70

- 1) Prade sajeroning pakulawargan wenten ahli waris langkungan ring adiri patut :
 - a. Kawentenang paigun indik padum waris inucap.
 - b. Yan tan prasida katunasang tatiban ring Prajuru (Kerta Desa).
 - c. Prade tan wenten cumpu ring panepas Kerta Desa, kengin katumusang ring sang Rumawos.
- 2) Prade karang inucap kapatungan patut Prajuru nibakang ring :
 - a. Sang sinanggeh ahli waris manut pawos 67 angka (1) miwah (2).
 - b. Sang kengin anggo Santana manut pawos 64 angka (1), (2), (3), (4), miwah (5)
 - c. Prade taler tan wenten cumpu ring panepas Kerta Desa kengin katumusang ring sang Rumawos.
- 3) Prade jantos karang Desa kaepah utawi kasepih, patut sowing-sowang nedunin makrama Desa ngarep.

SARGA VI

WICARA LAN PAMIDANDA

Palet 1

Pawos 71

- 1) Sane wenang mawosin minakadi mutusang wicara ring Desa inggih punika Prajuru Desa sinanggeh Kerta Desa.
- 2) Prade sang mawicara tan wenten cumpu ring pamutus Kerta Desa, kengin numusang ring sang Rumawos.

Pawos 72

- 1) Sahanan wicara mawiwit kacorahan sakeluwire sinanggeh nungkasin daging Awig-awig, Pararem miwah Pasuwaran Desa/Banjar, Prajuru patut dugelis mawosin tan nyantos pesadok.
- 2) Sajaba wicara sekadi ring ajeng patut nyantosang pasadok sang nunas bawos.
- 3) Panepase patut pastika nyantenang iwang patut malarapan Tri Premana (saksi, ilikita, bukti)miwah tan maren nepek ring catur dresta.

Palet 2
Indik Pamidanda
Pawos 73

- 1) Desa/Banjar wenang niwakang pamindanda ring warga sane sisipane.
- 2) Paniwak inucap kalaksanayang olih Bandesa/Kelihan Banjar.
- 3) Bacakan pamidanda luwire :
 - a. Ayahane panukun kasisipan.
 - b. Danda artha.
 - c. Kerampag.
 - d. Panyangaskara.
- 4) Pamidanda sane katiwakang patut masor singgih manut kasisipane.
- 5) Jinah utawi rajabrana pamidanda ngranjing dados druwen Desa/Banjar.

Pawos 74

- 1) Karma sane langkung ring tigang rahina ngelantur tan mawan urunan kadanda miwah kerampag.
- 2) Perampagan ngangge tata cara kadi ring sor :
 - a. Kalaksanayang olih Prajuru kesarengin olih saksi sakirang tigang diri.
 - b. Sang ngerampag sangkan darsana ngambil barang utawi nyawenin tenem tuwuh akehnya manut ring utangt sang kerampeg. Sang karampeg sangka lila nyukserahang barang sane karampag.
 - c. Prajuru miteketang mangda barang-barang sane kerampag digelis katebus masengker awuku, (7rahina) yan lintangan pacang kaadol.
 - d. Tan ngeninin saluwir barang sane patut inggilang manut Agama miwah tan mademang pangupajiwa sang karampag.

Pawos 75

- 1) Prade sang pacang karampag ngawara (ngelawang) pamargin inucap mawastu sampun tan nganutin awig – awig Desa Adat wenang karang Desane sane kagenagin kadaut olih desane.
- 2) Samalih yan purun taler ngalangin pelaksanaan sekadi ring ajeng tan wenten pamargi sajawaning kasepekan olih Krama Desa manut pararem.
- 3) Pamidanda inucap ring ajeng keni buntas risampun sang kekenini:
 - a. Nunas pangampura ring Krama Desa, riantukan nguwak pasubayan pararem pecak.
 - b. Nawur pengangan panguwak pasubayane duk pecak karampag kadulurin pamrayascita panyapsap kaiwangane ring Desa.

SARGA VII
NGUWUH – NGUWUHIN AWIG AWIG

Pawos 76

- 1) Nguwah nguwin Awig –Awig Desa Puniki kalaksanayang olih Paruman Desa.
- 2) Awig – awig puniki kamargiang ngawit kaingkupin (keraremin) olih Krama Desa Adat Banda.

Pawos 77

- 1) Sakeluwiring sane wenten saderengnya patut kaanutang ring sedaging Awig – Awig puniki.
- 2) Sakaluwirin sane during kaabawos sajroning Awig – Awig puniki patut kalaksanayang manut tata cara sane sampun memargi kadulurin antuk pararem.

SARGA VIII
PAMUPUT

Pawos 78

- 1) Awig – Awig puniki kararemin duk Rahina : Soma Kliwon Krulut, Tanggal ping 6, Sasih Jyestaha, Isaka 1910 tanggal masehi 16 Mei 1994, ring Desa Adat Banda.

- 2) Awig – Awig puniki kalingga tanganin olih Badesa kasarengin olih Klian –Klian Banjar/Tempekan saha kasaksinin olih Kepala Dusun miwah Kepala Desa Saba.
- 3) Luwirin sane ngelingga tanganin :

1. Kapertama Prajuru/dulun Desa :

Bandesa Adat Banda,

(Ida Bagus Oka Suryadi)

2. Kelihan Adat :
Penyarikan Rukun I

Penyarikan Rukun II

1. I Made Gloyoh

1. I Ketut Presa

2. I Ketut Bogoh

2. I Made Sujana

3. Kelihan

Pembimbing

(Ida Bagus Widana)

(Cokordo Anom Wardhana)

Mengetahui :
Kepala Dusun Banda,

Kepala Desa Saba

(I Nyoman Mertayasa)

(I Wayan Sumarsa)

Badan Pelaksana Pembina
Lembaga Desa Adat Kabupaten Gianyar

SUSUNAN PENULIS AWIG AWIG DESA ADAT BANDA

- I. PEPALIHAN KERTA AGAMA :
 1. I Wayan Wiranata
 2. I Ketut Wesna
 3. I Wayan Sueca
 4. I Ketut Badra
 5. I Ketut Rangkep
 6. Drs. I Wayan Sunita
 7. I Made Sumantra
 8. I Nyoman Munggu
 9. I Nyoman Supir
 10. I Made Pondok
 11. I Wayan Japa
 - II. PAPALIHAN SUKERTA TATA PAWONGAN :
 1. I Made Utama
 2. I Made Windia
 3. I Made Mutra
 4. I Made Darata
 5. I Wayan Presa
 6. I Made Kade Suarsana
 7. I Ketut Mupu
 8. I Wayan Mara
 - III. PEPALIHAN SUKERTA TATA PALEMAHAN :
 1. I Made Warta
 2. I Made Nedra
 3. I Ketut Sidiana
 4. I Ketut Sunarta
 5. I Made Dira
 6. I Wayan Londoh
 7. I Made Gloyoh
 8. I Wayan Sumarsa
 9. I Ketut Mandi
 - IV. PEPALIHAN SUKERTA TATA UMAS/SOSIAL :
 1. I Made Dones
 2. I Wayan Jagra
 3. I Ketut Dil
 4. I Wayan Nami
 5. I Nyoman Marna
 6. Ida Bagus Oka Suryadi
 7. I Made Uda
 8. I Nyoman Merthayasa
 9. I Made Dama
- PEMANGKU DESA ADAT BANDA :
1. Mangku Dalem
 2. Mangku Puseh
 3. Mangku Desa
 4. Mangku Tumpek

MENGETAHUI DAN TELAH DICATATKAN
PADA TANGGAL : 15 MARET 1995
NOMOR : 07 TAHUN 1995

BUPATI KEPALA DAERAH TINGKAT II GIANYAR,

(TJOKORDA GEDE BUDI SURYAWAN, SH)